

ხელშეკრულების დამდები მხარეები

შპს „ენგურჰესი“, იურიდიული მისამართი: ქ. თბილისი, ა. პოლიტკოვსკაიას ქ. №8, ფაქ. მდებარეობა: გალის რ-ნი, დას. საბერიო, შემდგომში „შემსყიდველად“ წოდებული, მისი დირექტორთა საბჭოს თავმჯდომარის - ლევან მებონიას სახით, რომელიც მოქმედებს კომპანიის წესდების შესაბამისად ერთი მხრივ და

შპს „მშენსერვისი 2002“, იურიდიული მისამართი: ქ. თბილისი, გლდანი, ქერჩის ქ. №3, შემდგომში „მიმწოდებლად“ წოდებული, მისი დირექტორის - ლუდმილა გვაგვალაიას სახით, რომელიც ასევე მოქმედებს კომპანიის წესდების შესაბამისად მეორეს მხრივ, შესყიდვების ერთიანი ელექტრონული სისტემით გამოცხადებული ელექტრონული ტენდერის - NAT210018431 საფუძველზე დებენ წინამდებარე სახელმწიფო შესყიდვების შესახებ ხელშეკრულებას შემდეგზე:

1. ხელშეკრულებაში გამოყენებულ ტერმინთა განმარტებები

- 1.1 „ხელშეკრულება სახელმწიფო შესყიდვის შესახებ“ (შემდგომში-„ხელშეკრულება“) - შემსყიდველსა და მიმწოდებელს შორის დადებული წინამდებარე ხელშეკრულება, რომელიც ხელმოწერილია მხარეთა მიერ, მასზე თანდართული ყველა დოკუმენტით.
- 1.2 „ხელშეკრულების ღირებულება“ - საერთო თანხა, რომელიც უნდა გადაიხადოს შემსყიდველმა მიმწოდებლის მიერ ხელშეკრულებით ნაკისრი ვალდებულებების სრული და ზედმიწევნით შესრულებისათვის.
- 1.3 „დღე“, „კვირა“, „თვე“- კალენდარული დღე, კვირა, თვე.
- 1.4 „შემსყიდველი“ - ორგანიზაცია, რომელიც ახორციელებს შესყიდვას.
- 1.5 „მიმწოდებელი“ - პირი, რომელიც ახორციელებს მიწოდებას ხელშეკრულების ფარგლებში.
- 1.6 „სამშენებლო სამუშაო“ - ხელშეკრულების მე-2 მუხლით გათვალისწინებული ხელშეკრულების საგანი.

2. ხელშეკრულების საგანი და კლასიფიკატორის კოდი

2.1 შესყიდვის ობიექტია:

შპს „ენგურჰესი“-ს მიერ დას. საბერიოს წყალმომარაგების ცენტრალური მაგისტრალის რეაბილიტაციისა და ცენტრალური და შიდა საკანალიზაციო ქსელის გამოცვლის სამუშაოები; ხელშეკრულებას თან ერთვის ხარჯთაღრიცხვები, რომლებიც წარმოადგენენ ხელშეკრულების განუყოფელ ნაწილს.

2.2 კლასიფიკატორის კოდია: 45231300;

3. ხელშეკრულების ფასი და ანგარიშსწორების პირობები

- 3.1 სახელშეკრულებო თანხა შეადგენს: 194000 (ასოცმოცდათოთხმეტი ათასი) ლარს დღგ-ს ჩათვლით;
- 3.2 ანგარიშსწორება მოხდება უნაღდო ანგარიშსწორებით ეროვნულ ვალუტაში - ლარებში.
- 3.3 შემსყიდველი მიმწოდებელს (მოთხოვნის შემთხვევაში) ავანსის სახით გადაუხდის სახელშეკრულებო თანხის 30%-ს, მიმწოდებლის მიერ ამავე ოდენობის თანხაზე უპირობო და გამოუხმობი საბანკო გარანტიის წარმოდგენიდან 5 (ხუთ) სამუშაო დღეში;
- 3.4 ანგარიშსწორება მოხდება ეტაპობრივად, შესრულებულ სამუშაოებზე ინსპექტირების ჯგუფის მიერ ხელშეკრულების მე-5 მუხლით განსაზღვრული პირობების დაცვით მიღება-ჩაბარების აქტის შედგენისა და მიმწოდებლის მიერ სათანადო ფინანსური დოკუმენტაციის წარდგენიდან 5 (ხუთ) სამუშაო დღეში;
- 3.5 საბოლოო ანგარიშსწორება მოხდება ინსპექტირების ჯგუფის მიერ ხელშეკრულების მე-5 მუხლით განსაზღვრული პირობების დაცვით საბოლოო მიღება-ჩაბარების აქტის შედგენისა და მიმწოდებლის მიერ სათანადო ფინანსური დოკუმენტაციის წარდგენიდან 5 (ხუთ) სამუშაო დღეში;

3.6 გაუთვალისწინებელი თანხების ათვისების პირობების დადგომის შემთხვევაში მხარეები აფორმებენ დამატებით შეთანხმებას შესაბამის დოკუმენტებთან ერთად (დამატებით ჩასატარებელი სამუშაოების სადეფექტო აქტი, სამუშაოთა მოცულობა და ხარჯთაღრიცხვა);

4. სამუშაოს შესრულების ადგილი, ვადები და პირობები

4.1 სამუშაოების შესრულების ადგილია: აფხაზეთი, გალის რ-ნი, დას. საბერიო.

4.2 სამუშაოების შესრულების ვადაა: 60 (სამოცი) კალენდარული დღე სახელმწიფო შესყიდვების შესახებ ხელშეკრულების გაფორმების დღიდან.

4.3 მიმწოდებელს უფლება აქვს სამუშაოები შეასრულოს განსაზღვრულ ვადაზე ადრე.

5. შესყიდვის ობიექტის მიღება-ჩაბარების წესი

5.1. მიმწოდებლის მიერ შესრულებული სამუშაოების მიღება შემსყიდველის მიერ ხორციელდება ეტაპობრივად.

5.2. მიმწოდებლის მიერ როგორც ეტაპობრივად, ისე საბოლოოდ შესრულებული სამუშაოები მიღებულად ჩაითვლება მხოლოდ ფაქტობრივად შესრულებულ სამუშაოებზე სსიპ „ლევან სამხარაულის სახელობის სასამართლო ექსპერტიზის ეროვნული ბიუროს“ მიერ გაცემული დადებითი საექსპერტო დასკვნის საფუძველზე გაფორმებული მიღება-ჩაბარების აქტისა (ფაქტობრივად შესრულებული სამუშაოების მიღების აქტი (ფორმა №2)) და შემსყიდველის მიერ საგადასახადო ანგარიშ-ფაქტურის დადასტურების შემდეგ. იმ შემთხვევაში, თუ საექსპერტო დასკვნასა და შესაბამის მიღება-ჩაბარების აქტს (ფაქტობრივად შესრულებული სამუშაოების მიღების აქტი) შორის აღმოჩნდება ცდომილება, მიმწოდებელი ვალდებულია დაუყოვნებლივ აუნაზღაუროს შემსყიდველს აღნიშნულ საექსპერტო მომსახურებაზე გაწეული ხარჯები და საკუთარი სახსრებით უზრუნველყოს შესაბამისი ხარვეზების დროული აღმოფხვრა.

5.3. შემსყიდველი უფლებამოსილია, მიმწოდებლის მიერ წინამდებარე ხელშეკრულების საფუძველზე განსახორციელებელი სამუშაოების მიმდინარეობისას, საკუთარი სახსრებით, სსიპ „ლევან სამხარაულის სახელობის სასამართლო ექსპერტიზის ეროვნული ბიუროს“ მეშვეობით ჩაატაროს ფაქტობრივად განხორციელებული სამუშაოების ექსპერტიზა. იმ შემთხვევაში, თუ საექსპერტო დასკვნასა და ფაქტობრივად შესრულებულ შესაბამის სამუშაო(ებ)ს შორის აღმოჩნდება ცდომილება, მიმწოდებელი ვალდებულია დაუყოვნებლივ აუნაზღაუროს შემსყიდველს აღნიშნულ საექსპერტო მომსახურებაზე გაწეული ხარჯები და საკუთარი სახსრებით უზრუნველყოს შესაბამისი ხარვეზების დროული აღმოფხვრა.

5.4. ხელშეკრულების ფარგლებში შესრულებულ სამუშაოებზე, სსიპ „ლევან სამხარაულის სახელობის სასამართლო ექსპერტიზის ეროვნული ბიუროს“ მიერ გაცემული დადებითი საექსპერტო დასკვნის საფუძველზე მიღება-ჩაბარებას ახორციელებს ინსპექტირების ჯგუფი, რომელიც ადგილზე ამოწმებს ხელშეკრულებით განსაზღვრულ ეტაპობრივად და საბოლოოდ შესრულებული სამუშაოების მოცულობას და ხარისხს.

5.5 შემსყიდველის მხრიდან მიღება-ჩაბარების აქტის ხელმოწერაზე უფლებამოსილი პირებია:

- შპს „ენგურჰესი“-ს ტექნიკური დირექტორი - გ. ხუბუა;
- შპს „ენგურჰესი“-ს რემონტების მენეჯერი - ი. შონია;
- შპს „ენგურჰესი“-ს სტგ-ს უფროსი - რ. გვაგვალია;
- შპს „ენგურჰესი“-ს კომუნალური განყოფილების უფროსი - ს. კვირკველია;

6. მხარეთა უფლება-მოვალეობანი

6.1 „მიმწოდებელი“ კისრულობს ვალდებულებას:

- მკაცრად დაიცვას მომსახურების დამთავრების სახელშეკრულებო ვადები, უზრუნველყოს სათანადო ხარისხი;
- მკაცრად დაიცვას უსაფრთხოების ტექნიკის წესები;
- გამოიყენოს უსაფრთხოების დაცვის საკუთარი საშუალებები;
- სამუშაო პროცესს ზედამხედველობა გაუწიოს შრომის უსაფრთხოების საკუთარმა სპეციალისტმა;
- სამუშაოები შეასრულოს საკუთარი მასალებით, სამუშაო იარაღებითა და სამარჯვებით.
- „მიმწოდებლის“ მხრიდან პასუხისმგებელი პირი ვალდებულია ნებისმიერ დროს მოახსენოს „შემსყიდველის“ წარმომადგენელს სამუშაოების შესრულებისას წამოჭრილი პრობლემების შესახებ.

6.2 „შემსყიდველი“ კისრულობს ვალდებულებას:

- მოახდინოს „მიმწოდებლის“ სამუშაოზე დაშვება არსებული უსაფრთხოების ტექნიკის წესების სრული დაცვით.

- დროულად აუნაზღაუროს „მიმწოდებელს“ შესრულებული სამუშაოების საფასური.

6.3 სამუშაოების შესრულების დაწყებამდე მხარეები იძლევიან ინფორმაციას მათი მხრიდან სამუშაოს წარმოებასა („მიმწოდებელი“) და ზედამხედველობაზე („შემსყიდველი“) პასუხისმგებელი პირების დანიშვნის შესახებ.

7. ხელშეკრულების შესრულების კონტროლი

7.1 შემსყიდველს უფლება აქვს ხელშეკრულების შესრულების ნებისმიერ ეტაპზე განახორციელოს კონტროლი მიმწოდებლის მიერ ნაკისრი ვალდებულებების შესრულებაზე.

7.2 ხელშეკრულების შესრულებაზე კონტროლს განახორციელებს ინჰექტირების ჯგუფი შემდეგი შემადგენლობით:

შპს „ენგურჰესის“ ტექნიკური დირექტორი - გ. ხუბუა;

შპს „ენგურჰესის“ რემონტების მენეჯერი - ი.შონია;

შპს „ენგურჰესის“ სტგ-ს უფროსი - რ. გვაგვალაია;

შპს „ენგურჰესის“ კომუნალური განყოფილების უფროსი - ს. კვირკველია;

8. გარანტია

8.1 შესრულებული სამუშაოების საგარანტიო ვადაა 3 წელი, დაზიანების თაობაზე შეტყობინების მიღებიდან რეაგირება 24 საათის განმავლობაში, აღდგენა: დაზიანების სირთულიდან გამომდინარე გონივრულ ვადებში მიმწოდებლის მიერ დამატებითი ანაზღაურების გარეშე.

8.2 საგარანტიო პერიოდი არ ეხება ფორსმაჟორული და მექანიკური ზემოქმედებით მომხდარ დაზიანებებს.

9. მხარეთა პასუხისმგებლობა ხელშეკრულების პირობების შეუსრულებლობისას

9.1 მხარეების მიერ ხელშეკრულებით ნაკისრი ვალდებულებების შეუსრულებლობა გამოიწვევს პასუხისმგებლობას მოქმედი კანონმდებლობის შესაბამისად.

9.2 თუ ხელშეკრულების რომელიმე მხარე დაარღვევს წინამდებარე ხელშეკრულებიდან გამომდინარე ვალდებულებებს, მაშინ ხელშეკრულების მეორე მხარეს შეუძლია მოითხოვოს ხელშეკრულებიდან გასვლა ვალდებულების შეუსრულებლობისთვის მის მიერ დამატებით განსაზღვრული ვადის უშედეგოდ გასვლის შემდეგ. თუ ვალდებულების ხასიათიდან გამომდინარე შეუძლებელია გამოყენებულ იქნას დამატებითი ვადა, მაშინ დამატებითი ვადის განსაზღვრას უთანაბრდება გაფრთხილება.

9.3 ხელშეკრულებიდან გასვლისას მხარეს შეუძლია მოითხოვოს ზიანის ანაზღაურება, რომელიც მას მიადგა მეორე მხარის მიერ ხელშეკრულებით ნაკისრი ვალდებულების შეუსრულებლობით.

9.4 ხელშეკრულებიდან გასვლასთან და ზიანის ანაზღაურებასთან დაკავშირებით გამოიყენება საქართველოს მოქმედი კანონმდებლობის შესაბამისი ნორმები.

9.5 შემსყიდველი უფლებამოსილია შესასრულებელი სამუშაოების ვადის გადაცილების შემთხვევაში, დააკისროს მიმწოდებელს პირგასამტეხლო ყოველ ვადაგადაცილებულ დღეზე შეუსრულებელი ვალდებულების 0.02 პროცენტის ოდენობით.

9.6 გადახდის ვადის გადაცილების შემთხვევაში, მიმწოდებელი უფლებამოსილია დააკისროს შემსყიდველს პირგასამტეხლო ყოველ ვადაგადაცილებულ დღეზე, გადაუხდელი თანხის 0.02 პროცენტის ოდენობით.

9.7 იმ შემთხვევაში, თუ ვადების გადაცდენისათვის დაკისრებული პირგასამტეხლოს ჯამური თანხა გადააჭარბებს ხელშეკრულების ღირებულების 10 პროცენტს, მეორე მხარეს უფლება აქვს შეწყვიტოს ხელშეკრულება.

10. საავანსო საბანკო გარანტია

10.1 მიმწოდებლის მიერ წარმოდგენილი ხელშეკრულების ღირებულების უპირობო და გამოუხმობი საავანსო საბანკო გარანტიის მოქმედების ვადა უნდა აღემატებოდეს ხელშეკრულების 4.3 პუნქტით განსაზღვრული სამუშაოების შესრულების ვადას 30 (ოცდაათი) დღით.

10.2 შემსყიდველის მიერ წარმოდგენილი უპირობო და გამოუხმობი საავანსო საბანკო გარანტიის თანხის გათავისუფლება განხორციელდება ეტაპობრივად, უპირობო და გამოუხმობი საავანსო საბანკო გარანტიისა და ყოველი შესრულებული სამუშაოების დამადასტურებელი მიღება-ჩაბარების აქტის პროპორციულად, რაც გულისხმობს, რომ ყოველი ანგარიშსწორების დროს (გარდა საბოლოო მიღება-ჩაბარების აქტის საფუძველზე განხორციელებული ანგარიშსწორებისა) შემსყიდველი დააკავებს შესრულებული სამუშაოების ღირებულების 30%-ს, ავანსად გადახდილი თანხის გაქვითვის უზრუნველსაყოფად. საბოლოო მიღება-ჩაბარების აქტის საფუძველზე განხორციელებული ანგარიშსწორებით მოხდება საბანკო გარანტიის სრულად გათავისუფლება, რის შემდეგაც გარანტიის დაბრუნება განხორციელდება მიმწოდებლის წერილობითი მოთხოვნის საფუძველზე.

10.3 მიმწოდებლის მიერ წარმოდგენილი საავანსო საბანკო გარანტია, შემსყიდველის მიერ შეიძლება გამოყენებულ იქნას იმ შემთხვევაში, თუ მიმწოდებელი ვერ უზრუნველყოფს ამ ხელშეკრულებით გათვალისწინებული სამუშაოების შესრულებას საბანკო გარანტიის მოქმედების ვადის გასვლამდე.

11. ხელშეკრულების პირობებისა და ფასების გადასინჯვა

11.1. ყველა დამატება ან შესწორება ამ ხელშეკრულების ირგვლივ ძალაშია მხოლოდ იმ შემთხვევაში, თუ ისინი ხელმოწერილი და დადასტურებულია ორივე მხარის მიერ.

11.2. მხარეებს შეუძლიათ შეწყვიტონ ხელშეკრულების მოქმედება თუ მეორე მხარე ან არ ან ვერ ასრულებს სახელშეკრულებო პირობებს. შეწყვეტის შესახებ მხარეები ატყობინებენ ერთმანეთს დაუყოვნებლივ მიზეზების ჩვენებით. ხელშეკრულების შეწყვეტამ არ უნდა გამოიწვიოს რომელიმე მხარის უფლებების შელახვა.

11.3. ფასთა ცვლილება განიხილება სამუშაოთა მოცულობაში ცვლილებების ან/და საქართველოს სამოქალაქო კოდექსის 398-ე მუხლით გათვალისწინებული გარემოებების დადგომის შემთხვევაში, მაგრამ არა უმეტეს სახელშეკრულებო თანხის 10%-ისა.

12. ხელშეკრულების შესრულების შეფერხება

12.1 თუ ხელშეკრულების შესრულების პროცესში მხარეები წააწყდებიან რაიმე ხელშემშლელ გარემოებებს, რომელთა გამო ფერხდება ხელშეკრულების პირობების შესრულება, ამ მხარემ დაუყოვნებლივ უნდა გაუგზავნოს მეორე მხარეს წერილობითი შეტყობინება შეფერხების ფაქტის, მისი შესაძლო ხანგრძლივობის და გამომწვევი მიზეზების შესახებ. შეტყობინების მიმღებმა მხარემ, რაც შეიძლება მოკლე დროში უნდა აცნობოს მეორე მხარეს მის მიერ მიღებული გადაწყვეტილება აღნიშნულ გარემოებებთან დაკავშირებით.

12.2 იმ შემთხვევაში, თუ ხელშეკრულების პირობების შეფერხების გამო მხარეები შეთანხმდებიან ხელშეკრულების პირობების შესრულების ვადის გაგრძელების თაობაზე, ეს გადაწყვეტილება უნდა გაფორმდეს ხელშეკრულებაში ცვლილებების შეტანის გზით.

13. ფორს-მაჟორი

13.1 ფორს-მაჟორული გარემოებები შეიძლება მოიცავდეს შემდეგ გარემოებებს, რომლებიც ვერ იქნება კონტროლირებადი მხარეთა მიერ: საომარი მოქმედება (გამოცხადებული ან გამოუცხადებელი), ბლოკადა, რევოლუცია, რადიოაქტიური დაბინძურება ან იონიზირებული რადიაცია, ხანძარი, მიწისძვრა, შტორმი, ციკლონი, ეპიდემია, საქართველოს აღმასრულებელი ან საკანონმდებლო ხელისუფლების მიერ გამოცემული ნორმატიული აქტი. თუ ისინი უშუალო ზემოქმედებას ახდენენ ხელშეკრულების შესრულებაზე ხელშეკრულების შესრულების ვადა გადაიწვეს შესაბამისი დროით გარემოებათა დასრულების შემდეგ.

13.2 თუ სახელშეკრულებო ვალდებულების მთლიანი ან ნაწილობრივი შეუსრულებლობის პირობები გაგრძელდება ერთ თვეზე მეტ ხანს, მხარეებს უფლება აქვთ შეწყვიტონ ხელშეკრულების მოქმედება დამატებითი კომპენსაციის უფლების მოთხოვნის გარეშე.

13.3 მხარე, რომელსაც შეექმნა ფორს-მაჟორი გარემოება, დაუყოვნებლივ აცნობებს მეორე მხარეს ამის შესახებ.

14. დავები და მათი გადაწყვეტის წესი

14.1 ხელშეკრულების შესრულებისას მხარეთა შორის წამოჭრილი დავები ან აზრთა სხვადასხვაობა შესაძლებელია გადაწყვეტილ იქნას ორივე მხარის ერთობლივი მოლაპარაკების საფუძველზე. შეთანხმების მიუღწევლობის შემთხვევაში, მხარეები მიმართავენ სასამართლოს, საქართველოს კანონმდებლობის შესაბამისად. მხარეები თანხმდებიან, რომ პირველი ინსტანციის სასამართლოს გადაწყვეტილება მიექცევა დაუყოვნებლივ აღსასრულებლად, საქართველოს სამოქალაქო საპროცესო კოდექსით დადგენილი წესით.

15. ხელშეკრულების მოქმედების ვადა

16.1 წინამდებარე ხელშეკრულება ძალაში შედის ხელშეკრულებაზე ბოლო კვალიფიციური ელექტრონული ხელისმოწერის ან/და ბოლო კვალიფიციური ელექტრონული შტამპის განთავსების დღიდან და მოქმედებს 2022 წლის 5 თებერვლის ჩათვლით.

15. მხარეთა იურიდიული მისამართები და რეკვიზიტები

"შემსყიდველი"
შპს „ენგურჰესი“
ს/კ 251716371

იურიდიული მისამართი: ქ.თბილისი,
ა. პოლიტკოვსკაიას ქ. №8
სს „ვი თი ბი ბანკი ჯორჯია“
ბ/კ UGEBGE22
ა/ა GE97VT660000003403403

დირექტორთა საბჭოს თავმჯდომარე

ლევან მებონია

"მიმწოდებელი"
შპს „მშენსერვისი 2002“
ს/კ 200076210

იურიდიული მისამართი: ქ. თბილისი,
გლდანი, ქერჩის ქ. №3
სს „თიბისი ბანკი“
ბ/კ TBCBGE22
ა/ა GE40TB7413036050100001

დირექტორი

ლუდმილა გვაგვალია

ვიზა: იურიდიული სამსახური:

